

RELACION

PËR

PROJEKTLIGJIN “PËR DISA NDRYSHIME DHE SHTESA NË LIGJIN NR.124/2015, “PËR EFICËNCËN E ENERGJISË”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Në kuadër të reformës së deregulimit dhe me qëllim krijimin e lehtësirave të mëtejshme për përmirësimin e klimës së biznesit, nëpërmjet reduktimit të barrierave administrative, janë analizuar të gjitha licencat dhe lejet e përfshira në anekset 1 e 2, të vendimit nr.538, datë 26.5.2009, të Këshillit të Ministrave, “Për licencat dhe lejet që trajtohen nga ose nëpërmjet Qendrës Kombëtare të Biznesit”, të ndryshuar.

Në përfundim të analizës, ndër të tjera, u arrit në konkluzionin se 23 licenca eliminohen.

Me anë të këtyre ndryshimeve synohet të arrihet, si më poshtë vijon:

- a) Reduktimi i barrierave administrative;
- b) Liberalizimi i tregut;
- c) Përmirësimi i mëtejshëm i klimës së biznesit.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË PROJEKTAKTEVE DHE DOKUMENTE TË TJERA POLITIKE

Miratimi i këtij projektligji nuk është i planifikuar në programin analitik të projektakteve të Këshillit të Ministrave për vitin 2018.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Neni 5, i ligjit nr.10081, datë 23.2.2009, “Për licencat, autorizimet dhe lejet në Republikën e Shqipërisë”, të ndryshuar, parashikon se: “Me përjashtim të rasteve kur parashikohet ndryshe në këtë ligj, si rregull, kushtet e përgjithshme të licencimit, autorizimit dhe lejimit, organi kompetent që vlerëson përmbushjen e këtyre kushteve, organi kompetent për inspektimin dhe/ose për revokimin e licencës, autorizimit dhe lejes, si dhe shkaqet e revokimit përcaktohen me ligj, ndërsa kushtet e posaçme të licencimit, të autorizimit dhe lejimit, dokumentet

shoqëruese, që paraqiten për pajisjen me licencë, autorizim apo leje, afati i vlefshmërisë së licencës, të autorizimit dhe lejes, procedurat e shqyrtimit dhe të vendimmarrjes dhe afatet për kryerjen e tyre, si dhe procedurat e revokimit miratohen me akt nënligjor, në bazë dhe në zbatim të këtij ligji dhe të ligjit që e parashikon atë licencë, autorizim apo leje.”.

Projektligji propozon shfuqizimin e licencës “Auditues energjetik” dhe të licencës “Shërbime energjetike”, të cilat janë parashikuar si licenca në ligj, por ende nuk janë përfshirë në njëërën prej kategorive dhe nënkategorive të përcaktuara në aneksin 1, të vendimit nr.538, datë 26.5.2009, të Këshillit të Ministrave, “Për licencat dhe lejet që trajtohen nga ose nëpërmjet Qendrës Kombëtare të Biznesit”, të ndryshuar.

Me shfuqizimin e kësaj licence ushtrimi i veprimtarisë së auditimit të energjisë dhe shërbimet energjetike do të jenë të lira.

Ndërkohë, ky projektligj parashikon se veprimtaritë e auditimit të energjisë dhe shërbimet energjetike mund të kryhen vetëm nga subjektet e certifikuara për këtë qëllim. Certifikohen për kryerjen e këtyre veprimtarive personat fizikë, të regjistruar si të tillë, që kanë aftësi teknike dhe përvojën e nevojshme për kryerjen e këtyre veprimtarive. Kjo veprimtari mund të kryhet dhe nga persona juridikë, të cilët kanë të regjistruar në regjistrin tregtar, si objekt veprimtarie, kryerjen e kësaj veprimtarie dhe që kanë të punësuar individë të certifikuar.

Projektligji parashikon se shërbimet energjetike ofrohen nga subjekte që kanë të regjistruar në regjistrin tregtar, si objekt veprimtarie, kryerjen e kësaj veprimtarie.

Për më tepër, ky projektligj parashikon se ministria përgjegjëse për energjinë mban regjistrin kombëtar për personat fizikë dhe juridikë, të cilët ushtrojnë aktivitet si auditues energjetikë dhe si ofrues të shërbimeve energjetike.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektligji është në përputhje me nenet 78 dhe 83, pika 1, të Kushtetutës.

V. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKTET NORMATIVE)

Projektligji nuk përafron e nuk lidhet me asnjë *acquis* të Bashkimit Evropian.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Me anë të këtij projektligji propozohet shfuqizimi i licencave “Auditues energjetik” dhe “Shërbime energjetike”, të cilat janë parashikuar si licenca në ligj, por akoma nuk janë përfshirë në njërën prej kategorive dhe nënkategorive të përcaktuara në aneksin 1, të vendimit nr.538, datë 26.5.2009, të Këshillit të Ministrave, “Për licencat dhe lejet që trajtohen nga ose nëpërmjet Qendrës Kombëtare të Biznesit”, të ndryshuar.

Me shfuqizimin e kësaj licence ushtrimi i veprimtarisë së auditimit të energjisë dhe shërbimet energjetike do të jenë të lira.

Projektligji parashikon se veprimtaritë e auditimit të energjisë dhe shërbimet energjetike mund të kryhen vetëm nga subjektet e certifikuara për këtë qëllim. Certifikohen për kryerjen e këtyre veprimtarive personat fizikë, të regjistruar si të tillë, që kanë aftësi teknike dhe përvojën e nevojshme për kryerjen e këtyre veprimtarive. Kjo veprimtari mund të kryhet dhe nga persona juridikë, të cilët kanë të regjistruar në regjistrin tregtar këtë objekt veprimtarie dhe kanë të punësuar individë të certifikuar.

Në projektligj parashikohet se shërbimet energjetike ofrohen nga subjekte që kanë të regjistruar në regjistrin tregtar si objekt veprimtarie kryerjen e kësaj veprimtarie.

Për më tepër, ky projektligj parashikon se ministria përgjegjëse për energjinë mban regjistrin kombëtar për personat fizikë dhe juridikë, të cilët ushtrojnë aktivitet si auditues energjetik dhe si ofrues të shërbimeve energjetike.

VII. INSTITUCIONET DHE ORGANET QË NGARKOHEN PËR ZBATIMIN E PROJEKTAKTIT

Ngarkohet Ministria e Infrastrukturës dhe Energjisë për marrjen e masave për zbatimin e këtij projektligji.

VIII. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Ky projektligj nuk ka efekte financiare në buxhetin e shtetit.

KËSHILLI I MINISTRAVE